



Saül ayant consulté avec Samuel, par le moyen d'une Deuineresse, bataille contre les Philistins, & est déconfit avec ses enfans.

A PRES la mort de Samuël les Philistins s'assemblerent, & vinrent, & mirent leur camp en Sunam contre Israël; & Saül assembla aussi tous ceux d'Israël, & vint en Gelboé, & vid l'armée des Philistins, & craignit; & son cœur s'espouuanta fort, & demanda conseil au Seigneur, lequel ne luy respondit point, ne par songe, ne par les Prestres, ne par les Prophetes. Doncques Saül eut recours à vne Deuineresse, qui luy fit reuenir Samuël le Prophete. Et Samuël dist à Saül, Le Seigneur diuifera le Royaume de ta main, & le donnera à Daud ton prochain, pource que tu n'as point obey à la voix du Seigneur, & n'as point exercé l'ire de sa fureur sur Amalech. Le Seigneur donnera aussi Israël avec toy en la main des Philistins, & demain toy & tes fils serez avec moy: Ce qui estonna grandement le Roy, lequel le lendemain ne laissa de liurer bataille aux Philistins, & les hommes d'Israël s'enfuirent, & tomberent morts en la montagne de Gelboé. Et les Philistins assaillirent Saül & ses fils, & frapperent Ionathas & Aminadab & Melchisua les fils de Saül, & mesmes Saül y fut fort nauré par les Archers, de sorte que par desespoir il se ietta sur son espée. Et les enfans d'Israël voyans cela, delaisserent leurs Citez, & s'enfuirent.